

中國歷史文集叢刊

〔宋〕呂本中撰
韓西山輯校

呂本中全集

四



中華書局

中國歷史文集叢刊

呂本中全集

四

〔宋〕呂本中撰
韓西山輯校

中華書局

東萊詩集卷八

問晁伯宇疾二首^①

晁子卧京城，歲月晚不用。偷身出塵土，閉户忍疾痛。客來不與語，有口吾懶動。今年又請老，氣力當少縱。生平厭筆墨，棄去不復弄。頗念白頭親，甘旨須子奉。呻吟在衽席，妙語時一諷。誰令稻粱謀，未答泉石夢。鄙夫託末契，義實憂患共。天定或勝人，寡固不敵衆。請公但縮手，保此清淨供。因書報安否？兼與問群從。

取驥伏鹽車，更欲繫其足。於物未有害，罰汝則已酷。晁子江海士，老去自窘束。平生萬卷書，豈只十年讀。隨身幾箱篋，一一手自錄。初無解衣贈，未免操戈逐。仲也抱瑚璉，幼亦好奇服。西堂老弘微，與子同軌躅。過門有江謝，共語喧破屋。棄官吾已懶，覆種子未孰。逢人強應接，遇事多詬辱。何時把鋤頭，得止季路宿。

【校記】

① 問晁伯宇疾二首：宋集珍本、四庫本卷八無此詩。

商村河決^①

今年河口決商村，遠望飛濤正馬奔。曲港定無蛟鱷橫，下田甘受雨泥渾。衣裳蟣蝨藏針縫，頭面塵沙露爪痕。猶恐因循葬魚腹，故人無地與招魂。

【校記】

① 商村河決：宋集珍本、四庫本卷八無此詩。

新霜行^①

新霜下幽蘭，昔在顧眄間。時過理當爾，敢復致一言。物生無榮賤，悉是君所見。相值有相違，誰能滿吾願。田園棄荒蕪，官居走郵傳。誤尋文字盟，秣馬當百戰。一飯或未飽，逢人足嫌怨。窮於投林猿，窘若巢幕燕。忍學少年子，羽翼偷絢練？百萬買纏頭，千金奉娛宴。願爲匣中玉，不作秋後扇。丈夫重許與，正爾未爲倦。絕糧有不死，酒肉虛健羨。古人馬伏波，吾猶識君面。

【校記】

① 新霜行：宋集珍本、四庫本及《兩宋名賢小集》卷一〇二《紫微集》載是詩，皆題爲《問晁伯宇》，少

首「新霜下幽蘭，昔在顧眄間。時過理當爾，敢復致一言」四句。

將去曹南連得江晁書因歎存歿諸友遂成長韻

西風脫殘暑，我病不自聊。吏舍少還往，亦復長蓬蒿。欣然脫帽去，念此非一朝。陽翟未遽往，寧陵虛見招。初無食息地，未免柴水勞。故人數通書，尚有江與晁。窮涂感節義，俗耳受風騷。向來相知人，昔盛今寂寥。落日送汪謝，荒山留老饒。關侯最傑立，亦以膏自燒。後生有向子，更盡兒女嬌。出門天奪之，不令上雲霄。坐看朋友淚，未減春秋褒。怪我但羸疾，悞蒙風雨搖。日月費奔走，文章勤琢雕。會須領妻子，更欲投吾曹。耆舊喚歸隱，諸公憐久要。自注：劉丈器之及顏平仲、向伯恭、韓秉則諸人，皆相約爲一州之隱，以便往還講席之益。出同赴雞黍，歸但守簞瓢。相將訪雲山，所至雜漁樵。還當古渡口，卧聽西江潮。

精衛詩

西山有鳥，其狀如鳥。名曰精衛，其名自呼。精衛堙海，不堙不止。問誰之報，云帝之子。帝子女娃，往遊不還。精衛求之，不敢有安。海流不改，汝堙不遷。嗟哉精衛，志則可憐。我昔讀書，惟聖之求。竭力從之，以春及秋。老人宴居，審吾之學。惟時友朋，日就雕琢。

聖言甚微，吾意則近。近以識微，退或有進。三年于曹，惟罪之恐。人雖甚厭，子亦不勇。舒舒其雲，沄沄其水。子不與歸，而曰有以。豕羊在牢，芻秣之戀。烹庖及之，抑又誰怨。予學日遠，予道日踈。有愧精衛，其誰與居。精衛之飛，不必戾天。子之不如，寧有智焉。惟作與否，愚智之擇。小人作詩，惟一勸百。

寧陵弟相送至南京因成四韻寄季一子之叔用

白髮無端巧上頭，鏡中顏狀不能羞。要尋楊子一廛地，未用劉公百尺樓。野竹連陰護苔蘚，暮雲生雨續黃流。秋風有信鱸魚在，更約江晁共小舟。

十一月一日步河堤上

簿書糾纏人，欲出不自許。老吏環我前，更作附耳語。脫身上河堤，頗似晝伏鼠。河堤平如掌，下有千歲土。夕陽斂殘照，草木過寒雨。遊魚著釣餌，舟子快新煮。煮魚得放飯，尚嘆行役苦。江湖平生心，歲月可逆數。故人書斷絕，吾事有去取。歸來討清尊，妙句還一吐。

留侯

留侯下邳時，豪氣或未除。晚節欲輕舉，效在黃石書。其書本無言，一嘆三嗚呼。彼公實天人，識此鵠鳳雛。良田有蕪穢，令子痛自鉏。萬事不得已，一身常晏如。袖手默無語，四方瞻步趨。不知隆準公，果能知子無？小兒苟彘輩，下及崔浩徒。謂能明子心，此語亦已誣。不能處其知，正足殺其軀。所恨生已晚，聖門無坦塗。學不盡其才，未免風俗驅。詩書在煨燼，子何不回車。試問禮之本，更觀心地初。自注：莊生言：欲當則緣於不得已，不得已之類，聖人之道。留侯蓋庶幾於此。韓非曰：非知之難，處知爲難矣。此留侯與荀彘輩所以分也。使其親受業於聖人，蓋未可量。故妄作此詩，論其大概，實平昔所粗曉也。

送韓馥秉則赴棣倅

公如玉壺冰，見即離煩熱。況當清秋懸，更自貯霜月。中邊本無垢，何處覓焚熱。盛以百鍊銅^①，此亦不得折。初蒙一日欵，遽有千里別。扁舟轉青齊，歲事當雨雪。遠行不贏糧，已悟服食訣。古來饕餮徒，頗謂一世傑。唾壺彼何知，便爲如意缺。觀其所用心，舉不異鼠竊。首陽獨往人，渠自飽薇蕨。舉頭公一笑，百慮無以絕。江源初濫觴，末乃流不竭。

傷哉韞上鷹，一飽便飛掣。

【校記】

① 銅：宋集珍本、四庫本作「鋼」。

讀秦碑

秦人跨九州，欲以傳萬世。立石名山旁，往往章得意^①。至今見遺刻，字體甚雄異。壯哉蒼蘚文，未改回屈勢。風雨所侵蝕，中有千丈氣。嚴如虬龍蟠，深若鐵石利。餘威到山鬼，謹守敢失墜！漢魏能書人，亦豈可睥睨。未能識藩籬，何止趁姿媚。初無一日雅，但有三舍避。文章又奇古，遷雄蓋苗裔。觀其所稱述^②，肯爲尊者諱。巧言未大失，末乃爲俗累。嗚呼結繩前，此又誰與記。君臣俱無爲，垂拱天下治。春秋記日月，大易垂彖繫。嬴氏厭休息，動以衡石計。斯翁變古文，程邈分篆隸。自此更滋蔓，日以趨簡易。馳驅千百年，漫有紙墨費。誰能罷煩文，盡掃著天外。此書雖見存，或以少爲貴。持此槁木枝，我亦無甚愧。

【校記】

① 章：原校曰：「一作示。」

② 稱：原校曰：「一作著。」

次韻答曹州同官兼范寥信中

好詩有味終難捨，俗事無功莫羨渠。破曆屢翻深甕酒，短檠時檢舊窗書。何年雞黍先投社，是處田園可結廬。更請二公搜好句，一身苛癢要爬梳。

【附錄】

得海陵掾呂居仁書

張擴

故人溫飽竟何如，忽寄郵筒滿紙書。頗愧中年猶吏隱，相望千里未情踈。官曹清簡庭無訟，淮海豐穰食有魚。見說參禪新了了，幾時爲我痛爬梳。（《東窗集》卷四）

龔彥承觀軒

愛山不能歸，常恐山怪責。終歲在行役，感動頭已白。高秋強僮僕，路過龔掾宅。蒙君開南軒，除我眼界窄。白波遶青嶂，彷彿見顏色。江上飛來峰，却立對君側^①。蕭蕭蒲葦叢，不受塵土隔。知君有奇趣，笑我常偃仄。人生無窮已，得一乃願百。床頭貯美酒，窗下著好客。請公但默然，歲晚當有獲。

【校記】

①却：原作「卻」，據宋集珍本、四庫本改。

畫馬圖

平沙遠草春未生，萬馬夜起爭悲鳴。秋雲欲墜都護壘^①，急雪暗下屯田營。胡人却走畏深入^②，漢家飛將已雲集。此時一馬直萬錢^③，隴右河湟更供給。邊塵淨盡今百年，萬馬潦倒西風前。天生駿骨例艱阻，是處雕鞍蒙愛憐。君家九幅開新帳，歛見騶裊華堂上。長鞭不用羈絡遠，霧縠雲羅倚惆悵。高旌嫋嫋霜露微，苜蓿得雨連山肥。同時戰士今不歸，曹霸弟子能神奇。毫端妙處君得之，駑駘往來空爾爲。

【校記】

①墜：原校曰：「一作墮。」

②胡：四庫本作「邊」，宋集珍本與底本同。

③直：原校曰：「一作費。」

堤上^①

落花吹盡不堪憂，只見河堤水漫流。晚日強穿城北市，春風猶駐驛南樓。妻孥轉覺爲身

累，歲月終難忘汝留^②。萬里長江一尊酒，故人何處倚扁舟。

【校記】

① 堤上：此詩卷十重出。

② 忘：卷十《堤上》作「望」。

將赴海陵出京沿汴覓舟候送客不至遂行

子行殊未來，我馬已再秣。略投故人飯，苦厭從者聒。長河見舟楫，尚恐塵事奪。風翻蟬急噪，雨漱岸欲脫^①。南山已在眼，想望淮水闊。別離古所重，況在交友末。翩然欲行際，所寄一短褐。路長書來稀，何以慰飢渴。自注：四月二十二日出城至子我家，候子之、民師不至。因簡商丈、壯輿、夷行、伯野、季一、由中諸公。

【校記】

① 脫：宋集珍本作「耽」。

京師新鄭與諸晁兄弟往還前後數詩

夜雨不嫌久^①，凜然天欲秋。客燈吹叟滅，細雨落還休。未許金張並，虛爲鄠杜遊。江湖少

歸夢，知爲故人留。

我髮白已短，公愁安得長。牆根春薺老，瓶水臘梅香。侍立無天女，相隨有漫郎。平生湖

海興，今夜宿連牀。

髮短各已白，眼昏誰復明。殘春斷花柳，晚日閉柴荆。潦倒書常廢，驅馳夢或驚。尚於團

聚樂，雖老未忘情。

令弟窮顏蠟，書生老仲舒。相招得共處，何往更安居。歲月塵埃外，桑麻雨露餘。送行無

別物，圯上一編書。

苦語相留極，虛床會宿頻。山東今出相，海內不無人。婦女能尊客，兒童不厭貧。長途有

知遇^②，今日倍情親。

【校記】

① 雨：宋集珍本、四庫本作「語」。

② 知：原作「如」，據宋集珍本、四庫本、《兩宋名賢小集》本改。

本中將爲海陵之行念當復與子之作別意殊憤憤偶得兩詩

上呈并告送與壯輿叔用也

斯人如玉雪，可愛不可忘。助以濯滄海，亦復閔餘光。今茲困塵土，更伴衆翼翔。時來喚我語，共此一榻涼。風雨下頰舌，冰霜清肺腸。我老漸窘束，公才方頡頏。春秋有體製，子蓋能文章。要當纂微言，不以近故妨。粲然東園花，不登葵藿場。

老僕倦日長，羸馬困道遠。東行數日間，尚欲一再款。我能喻子意，子亦識我嬾。追懷十年遊，僅得一笑莞^①。時能煮湯餅，更復下茗盃。晁郎本京邑，劉子蓋楚產。江山兩秀異，與子日在眼。南風動歸興，感慨毛髮短。相尋儻有日，歲月亦未晚。

【校記】

① 莞：原作「筦」，據宋集珍本、四庫本改。

鴈

鴈從何方來，云自燕趙北。今當何所往，暖日近暘谷。寒雲墮江漢，未見所棲宿。朝憂稻梁少，莫畏罟網逐。惜哉還往頻，愈覺歲月促。悔不近藩籬，隨群伴雞鶩。羽幹何必好，志

願亦易足。物生有高下，終恐厭摧伏。公看滄海頭，萬里飛鴻鵠。

【校記】

① 置：宋集珍本、四庫本作「羅」。

赴海陵行次寶應^①

半升濁酒試蓴羹，賤買魚蝦已厭烹。淺水依蒲有船過，淡煙籠月更人行。交遊潦倒腸先斷，疾病侵陵涕自橫。北望中原一千里^②，故人誰復喚歸耕。

【校記】

① 赴海陵行次寶應：原校曰：「二作過白田。」

② 一：原校曰：「一作幾。」

海陵雜興八首

四海今誰託，飄然未有歸。先生作詩瘦，稚子食言肥。未忍螢枯死，甘隨鷁退飛。故人取堅坐，不爲賦無衣。

相見各已老，壯懷如昔然。蛟龍夜改穴，風雨暗移船。把酒猶堪醉，逢人嬾問禪。還家有

餘地，留我買山錢。

諸老今無恙，秋來數寄聲。尚能無事飲，猶勝不平鳴。行李虛長鋏，生涯共短檠。江湖日在眼，恐負白鷗鳴^①。

荒城足風雨，今日更新冬。草木山嵐暗，人家水影重。漫看文字過，時有簿書逢。目極橫塘路，西樓聞暮鍾。

曾子不復見，斯人絕可憐。夢回千嶂裏，氣奪萬夫前。異日文章社，平生香火緣。高樓更南望，霜露倚江天^②。自注：時曾元似新物故。

萬事不如意，自然添白鬚。極知少餘韻，何敢厭窮途。土俗尊魚婢，生涯欠木奴。東行見李白，誰爲致區區。

空山鶴夜鳴，海風令人驚。對月且愁思，看書終眼明。斗酒不爲薄，客帆那計程。猶憐它夜雨，曾作打窗聲。

輕帆載曉月，和夢到揚州^③。木落山光寺，江橫北固樓。漫拋三徑隱，虛有十年遊。尚勝劉師命，才因越女留。

【校記】

① 鳴：宋集珍本、四庫本作「盟」。

② 露：原校曰：「一作路。」

③ 到：原校曰：「一作別。」

往來送迎城南道中二絕

破裘重補却勝寒，暗減頭圍覺帽寬。數頃桑麻遶城路，每隨妓吏去迎官。
海氣如煙跨市樓，北風連夜舞梧楸^①。平生事業難牽強，坐守寒燈聽聒囚。

【校記】

① 舞：原校曰：「一作雨。」

家叔舍弟與黎介然會于符離因用兩絕奉寄

漫約同歸久未償，只今留滯各它鄉。春風有信勤歸鴈，夜雨何時復對床。
老覺爲官百不宜，故人雖在鬢如絲。遙知再踏同遊地，更想汪饒曳杖時。
自注：余昔與介然、德操、信民同寓符離。

病中夜聞雪作時堯明有廣陵之行未歸思爲數語奉寄久之
未就它日堯明歸攜詩相過飄然有馭風凌雲之氣因以前

詩答之

公方它山行，我此一室病。擁爐聽夜雪，若與風勢競。蕭條中疑休，狼藉久未定。平明望屋瓦，人我眼界靜。所恨子猷遠，無復肯乘興。想當巖壑間，玉立與輝映。時來有傑句，遂入風雅正。寒威固深避，草木自溫清。公家鶴擎翁，韻與羲皇並。流風及遠孫，筆力如此勁。彫績或過眼，惟我乃弗稱。新春上河堤，梅柳當歷聘。過從不厭數，荒疇取微徑。

次韻堯明貢院詩

忍窮不能歸，強飯亦良計。東風頻報春，草木可次第。厭爲龍頭縮，寧作龜尾曳。從來翰墨場^①，即有聞見滯^②。譬如已耕田^③，更欲深種藝。或蒙鹵莽報，未肯即棄置^④。不聞太倉粟，亦校豪髮細^⑤。王卿固倦遊，穢濁有蟬蛻^⑥。聲名動時人^⑦，我實託末契。泥塗倒屣齒，塵埃浣衣袂^⑧。要爲無用用，乃作不事事。下馬舊戰場^⑨，午日在庭庀^⑩。向來槁木枝，忽有紅綠綴。來非偶然往，去亦無所詣^⑪。聚蚊著甌中，得聽此鶴唳^⑫。窗前有餘馥^⑬，勝韻入